

La carta de San Pablo a los Gálatas

Galacia sita gånare Pablo ĩ papera cõare gaye

¹⁻² Ñati Galacia gånã mũa. Jesucristore tuorũnu sũyarã ñari, ĩ ocare riasotirona minijuasotirã yirãji mũa. Yũ ñã Pablo adi papera mũare cõagũ. ĩ oca yũ goti ucutoni yũre cũñi Jesucristo. Masa ñna cũru meje ñã yũ. Dios oca yũ goti ucutoni yũre cũbiticã masa. Dios, Jesucristo Jacũjũã yũre cũñi. ĩti ñami Jesús ĩ tũdi catiroca yirũ. Yũ sũgũ meje adi papera mũare cõã yũ. Yũ rãca gånã, adoju Jesucristore tuorũnrã cũni, “Quenajaro”, yi ñucama ñna mũare. ³ Queno mũare yijaro mani Jacũ Dios. Mani Uju Jesucristo cũni queno mũare yijaro ĩ. Ito yicõri mũa ya uši queno wanũ quenaroca yijaro ñna. Ito bajiro mũare yijaro yirocũ Diore seni ĩsia yũ. ⁴ Mani Jacũ Dios ĩ ãmoro bajiro yigũ ñari, mani ñẽñaro yirise waja, waja yirocũ manire godã ĩsiñi Jesucristo. Ito bajiri adi rãmũri cũni ñẽñaro yirã robo bajiro mani bajibe yirocũ, manire ejabũã masiguĩji Jesús. ⁵ “Ito bajiro yami ĩ”, yi masicõri, Diore rũcũbuotĩñarũja manire. “Rẽtoro quenagũ ñami Dios”, yi tũoĩtarũja manire. Ito bajiroti tũoĩatĩñarũja manire.

Jesucristore mani tuorũnũrena suoriti manire masogũ yiguĩji Dios, yire oca

⁶ Manire ti maicõri manire beseñi Dios. Cristore mani tuorũnũja ticõri, manire masoñi ĩ. Ito bajiro manire ĩ yire ñãbojarocati, yoari mejeti ĩre jidicã ãmoã mũa. Ito yicõri gaje ocãjũare tuorũnũã mũa. “Ito bajiro bajicã Galacia gånã”, masa ñna yija tũocõri, ucacũ yũ jabeto. ⁷ Dios oca riti ñã riojo gotire gaye. Ñe gaje oca bũto bũã quenasarise manojã. Jesucristore mani tuorũnũrena

suoriti manire masogũ yiguĩji Dios. Ñejuana gaje manire maso masibiquĩji Dios. Ito bajibojarocati mua tu gãna ricati muare oca riasorã yirãji ñna. Ito yicõri ñna robo bajiro mua tuoñajaro yirona, muare usirio coderã yirãji ñna. ⁸ Mua tũju yu ñaja, quenarise Dios ocare, ñaro bajiroti muare riasocu yu. Ricati ruore oca muare yu riasoja, jeame ñjuroju yure cõa masiguĩji Dios. No adi tuti gagu, ito yicõri ñmacũju Dios ñaro gagu cuni ricati ruore oca ñna riasoja, jeame ñjuroju ñnare cõaguĩji Dios. ⁹ Yu gotisuro bajiroti mucana juaji goti quenogũ ya yu. No Dios oca quenarisere jidicãcõri gaje oca ñna riasoja, jeame ñjuroju ñnare cõa masiguĩji Dios.

¹⁰ Ito bajiro yu riasoja, masa yure ñna wanutoni meje riasoa yu. Yure Dios wanujaro yirocu, ito bajiro riasoa yu. Iti rumuju masa yure ñna wanutoni gaje oca riasocu yu maji. Iti rumuju masa ñna wanutoni yu goticato bajiro yu gotibojaja, Cristo ñ amoru bajiro meje yigu ñaboguja yu. Ito yicõri ñre moa ñsiri masu meje ñaboguja yu.

Ado bajiro apóstol ñnasocu yu, Pablo ñ yire gaye

¹¹ Queno tuoja yu ñarã mua. Riti muare gotia yu. Jesucristo oca yu riasorise masa ñna tuoña rujeore meje ña. ¹² Iti oca quenarise yu masiroca yibiticã masa. Ito yicõri iti oca yure riasobicã masa. Jesucristoama ñmasiti yu masiroca yiquĩ ñ.

¹³ Iti rumuju gua judio masa tuoñare gaye riti rucubocu yu maji. Ito yu bajigore tuogoana ña mua. Iti rumuju Jesure tuorũnurãre ñeñaro ñna tõbujaroca yicu yu. Ito bajiri ñnare ti maicõri meje, ñnare suyacu yu. Ito yicõri ñnare ruyurio ñmogũ yibojacu yu. ¹⁴ Yu mamu ñagũ, gua judio masa tuoñare gaye queno rucubocu yu. Gua masa bucãrã ñna rotire gayere yu rãca corocõ tujarã rëto busaro queno cudicu yu. ¹⁵ Ito bajiro yu bajibojarocati, yure ñmogũ beseñi Dios. Iti rumuju yu rujearoto riojuaju yure

beseñi Dios. Yure ti maicōri, “Āni Pablo ĩ bucuaja, yu yagu ñagũ yiguñji ĩ”, yi tuoĩacōri yure beseñi Dios. ¹⁶ Ito bajiroti Dios ĩ āmori rumu, ĩ Macu Cristore yu masiroca yiñi ĩ ĩja. Ito bajiri adocāta, “Dios Macuti ñami Cristo”, yi tuoña masia yu ĩja. Ito bajiro yu masiroca yiñi Dios, judio masa mejere cuni ĩ oca yu goti ucutoni. Iti tuo masicōri, “¿No bajiro yigu yigujada yu?” yi seniābiticu yu gājerāre. ¹⁷ Ito yicōri yu riojua Jesucristo ĩ cūanare cuni seniārocu, Jerusalénju wabiticu yu. Ado bajirojua yicu yu. Yoari mejeti Arabia wame cutiri sitaju masa manojū tuoĩarocu wacu yu. Ito bero Damasco cutoju tūdi ejacu yu.

¹⁸ Itoju ūdia rodo ñacōri, Pedro rāca busirocu Jerusalénju wacu yu ĩja. Itoju ejacōri quince rumuri ĩ rāca ñacu yu. ¹⁹ Itoju ñagũ gājerā Jesús ĩ cūanare tibiticu yu. Pedro, mani Ūju ocabaji Santiagore cuni, ĩna jūarāti ticu yu. ²⁰ Dios ĩ tiro riojo adire uca yu. Ruobeu yu muare. Ado yu ucarise riti ña.

²¹ Jerusalénju yu ñaja bero Siria wame cutiri sitaju wa ucucu yu. Ito yicōri Cilicia wame cutiri sitaju cuni wa ucucu yu. ²² Yoari mejeti Judea sitaju yu ñajare, yure queno masi jedibiticā ito gāna maji. Ito bajiri ito gāna Jesure tuorūnūrā, yure queno masibiticā ĩna maji. ²³ Gājerā ĩna busire riti tuori seyoñi ĩna. “Manire ñeñaro ĩ yi āmorise jidicācōri gaje mame tuoĩare ña ĩre ĩja. Iti rumuju Jesure mani tuorūnūja ticōri, manire sīa āmoñi ĩ maji. Adi rumuriama manire bajiroti Jesucristore tuorūnūgũ yiguñji ĩ cuni”, masa ĩna yija, tuori seyoñi Judea sita gāna. ²⁴ “Jesucristore tuorūnūgũ ñami Pablo ĩja”, masa ĩna yija tuocōri, Diore queno rucubūore ocana busiñi ĩna.

2

Apóstol mesa Pablöre ĩna boca āmire gaye

¹ Catorce rodori bero m̄cana Jerusalénju wacu yu, Bernabé rāca. Ito yicōri Tito wame c̄tigu c̄ni baba c̄ti waquĩ gua rāca. ² Dios yure ito bajiro ĩ wa rotijare Jerusalénju wacu yu. Itoju ejacōri Jesure tuor̄n̄rāre ūmatā ñarā rāca riti b̄siroc̄, ĩna rāca minijuacu yu. Ado bajiro ĩnare goticu yu: “Masa ñajedirore maso āmoguĩji Dios. Ito bajiri judio masa mejere c̄ni ĩ oca quenarise goti ucu yu”, yicu yu Jesure tuor̄n̄rāre ūmatā ñarāre. Ito bajiro goticu yu ĩnare, yu tuoĩaro bajiro tuoĩacōri, “Riti oca quenarise goti ucuami Pablo”, yure ĩna yitoni. ³ Ito bajiro yu gotija bero s̄ḡure bajiro riti tuoĩacu gua ĩja. Ito bajiri s̄ḡure bajiro tuoĩacōri, yu rāca gagu Titore wirow ta rotibiticā ĩna ĩja. Judio masu meje Tito ĩ ñabojarocati, “Gua judio masa yisotiro bajiro wirow taruja m̄re”, yibiticā ĩna ĩre. ⁴ Gājerāma, “Jesure tuor̄n̄rā ña gua”, yi r̄orā Titore wirow ta rotibojacā ĩna. “¿No bajiro yati, Jesure tuor̄n̄rā? Ito yicōri, ¿b̄c̄urā masa rotire c̄diati ĩna?” yi senīarona, ḡare r̄orā gua rāca minijuacā ĩna. Gua rāca minijuacōri, “B̄c̄urā masa ĩna yisotiro bajiro yiruja manire”, yibojacā ĩna ḡare. ⁵ Ito bajiro ĩna yibojarocati ĩnare c̄dibiticu gua. Ito yicōri ĩna rotibojarisere c̄ni c̄dibiticu gua. Jesure riti mani tuor̄n̄uja manire masogũ yiguĩji ĩ. “B̄c̄urā rotirisere mani c̄dija, manire masogũ yiguĩji Dios”, m̄a yi tuoĩabititoni, ḡare ĩna rotibojarocati c̄dibiticu gua.

⁶ “Ito bajiro riasoami Pablo”, yicōri, “Gaje ado bajiro m̄ riasoja quena”, yure yibiticā Jesure tuor̄n̄rāre ūmatā ñari masa. “Ujarā ñasarā ñarāji ĩna”, yi tuoĩa güibiticu yu. ĩnare ĩ beseado bajiro ti yure c̄ni beseñi Dios. Coro bajiro ti manire ti maiami Dios. ⁷ Ujarā ado bajiro yicā yure: “Dios ĩ c̄ru ña m̄ c̄ni. Judio masa mejere c̄ni Jesús oca quenarise m̄ goti ucutoni m̄re c̄ri seyoñi Dios”, ya gua. “Iti r̄m̄ju Pedrore c̄ñi Dios, judio masare

oca quenarise ĩ gotitoni. Ito bajiroti mure cuni cūri seyoñi Dios, judio masa mejere cuni m̄ goti ucutoni”, yi t̄oĩa gua, yicã ɱjarã yure. ⁸ Riti ña. Pedrore cūñi Dios, judio masare oca quenarise ĩ goti ucutoni. Ito bajiroti cūñi Dios yure cuni, judio masa mejere ȳ riaso ucutoni.

⁹ Ito gãna Jesure t̄or̄un̄rã ɱjarã Santiago, Pedro, Juan cuni ado bajiro yicã ĩna yure: “Dios ĩmasiti mure queno yiroc̄ cūri seyoñi, ĩ oca judio masa mejere cuni m̄ riaso ucutoni. Ito bajiri ĩnare riaso ucur̄ja m̄. Ḡwareama judio masare ĩ oca riasotoni ḡware cūñi Dios. Ito bajiri ĩnare riasor̄ona ña gua. Ito yic̄ori coro bajiroti Diore moa ĩsir̄ja mani”, yicã ĩna yure. ĩna ito yija t̄oc̄ori, siḡure bajiro riti t̄oĩac̄u gua ĩja. Ito bajiri yure, ȳ rãca gaḡu Bernabére cuni ãmo ñia wan̄cã ĩna. ¹⁰ “Bojoro b̄jar̄are queno ejabuaya m̄a”, yicã ĩna ḡware. Ito bajiro ĩna yija t̄oc̄ori, wan̄ure rãca cudic̄u gua ĩja. Iti riti roticã ĩna ḡware.

Pedrore Pablo ĩ goti quenore gaye

¹¹ Antioquĩaj̄u ȳ ñaroca Pedro cuni ejaquĩ. Itoj̄u ejac̄ori queno yibitiquĩ ĩ. Ito bajiri “Iti seti ña mure”, yiroc̄u masa tiro riojo ĩre gotic̄u ȳ. ¹² Ado bajiro bajic̄u ĩre seti. Cajero Antioquĩaj̄u ejac̄ori queno yiquĩ Pedro maji. Judio masa meje ñarã rãca baba cutic̄ori, ĩna rãca baquĩ Pedro. Ito bajiro ĩ yi ñaroca Jerusalén gãna Santiago ĩ c̄oana ti ucurã ejacã ĩna cuni. “Judio masa meje ñarã rãca babitir̄ja mani. Ito yic̄ori Diore mani cudĩ ãmoja, wirot̄ar̄aj̄i mani”, yi t̄oĩarã ñacã ĩna. ĩna ejaja tic̄ori, ḡuĩquĩ Pedro. “Yure tudirã yir̄aj̄i”, yiroc̄u judio masa meje ñarã rãca tudĩ babitiquĩ Pedro ĩja. ¹³ Gãjerã judio masa ñarã, Pedro ĩ ḡũja tic̄ori, ĩre bajiroti judio masa meje ñarã rãca juaji babiticã ĩna cuni. Ito bajiro ĩna yija t̄oc̄ori, “ĩnare bajiroti yir̄ja yure cuni”, yi t̄oĩaquĩ

Bernabé. ¹⁴ “Jesure riti mani tuorũnũja manire masogũ yiguĩji Dios”, yi tuoĩa masibojarãti, bucurã rotirisejuare rucubũorã bajiro yicã ĩna. Ito bajiro ĩna yija ticõri, gãjerã Jesure tuorũnurã ĩna tiro riojo Pedrore tudicu yũ. Ado bajiro ĩre tudicu yũ: “Judio masũ ñabojaguti, Jesure mũ tuorũnũja bero, mani bucurã ĩna yisotirere jidicãyija mũ. Ito bajiro mũ yijama queno tuoĩayija mũ maji. Ito bajibojarocati mucana adocãta bucurã ĩna yisotire gayere rucubũogũ bajiro ya mũ. Ito yicõri judio masa mejere cuni rotiboja mũ. ‘Bucurã masa yisotire bajiro yiya mũa cuni’, yirocu ito bajiro ĩnare rotiboja mũ. Ito bajiro yibitirũja mũre”, yi goticu yũ Pedrore. Gaje ado bajiro ĩre goticu yũ:

Jesucristore mani tuorũnũja ticõri, mani jeyarore masogũ yiguĩji Dios, yire gaye

¹⁵ “Mani jũarã judio masa rujeana ña mani. Gãjerã masa, mani bucurã rotire gayere ñeñaro aja tudiana ĩna. ĩna robo ñeñaro yirã meje ña maniana. ¹⁶ Ito bajibojarocati, Moisés ñayoru rotire ñarocõti mani cudija cuni, ‘Queno yirã ñama. Seti ma ĩnare’, yibiquĩji Dios manire. Jesucristore riti mani tuorũnũjama, ‘Queno yirã ñama ĩna’, yigu yiguĩji Dios manire. Itire masicõri Dios manire ĩ boca ãmitoni Jesucristore riti tuorũnũa mani. ‘Jeyaro bucurã rotirise mani cudi ñabojarocati, Jesure mani tuorũnũbeja, manire boca ãmibiquĩji Dios’, yi tuoĩa mani. No bucurã rotire riti cudigure, ‘Queno yigu ñami ĩ’, yibiquĩji Dios. Ito yicõri ĩre boca ãmibiquĩji Dios”, yi goticu yũ Pedrore.

¹⁷ “Mani Jesure riti tuorũnũja, manire boca ãmigũ yiguĩji Dios”, mani yija tuocõri, “Ñeñaro ya mũa”, yirã yirãji mani masa. “Mani bucurã rotire gayere mũa cudibeja, gaje masa ñeñaro ĩna yiro bajiro ya mũa cuni”, yirã yirãji mani masa. Ado bajiro mũre seniĩa ãmoa yũ. ¿Mani ñeñaro yiroca, yigu yiguĩjida Cristo? “Yibiquĩji”,

yi tuoia yuama. Īre riti mani tuorūnaja, Dios rotirisere mani cūdiroca yigu yiguīji Jesucristo. ¹⁸ Ado robojua baja. “Jesure riti mani tuorūnaja, manire masogū yiguīji Dios”, yi tuoia yu. Ito bajibojarocati, iti ocare jidicācōri, “Mani bucurā ĩna rotire gayere mani rūcubuoja, manire masogū yiguīji Dios”, yu yi gotija, ñeñaro yiboraja yu. ¹⁹ Iti rumaju ado bajiro tuoĭabojacu yu maji. “Mani bucurā ĩna rotirisere ñarocōti mani cūdija, yure boca āmigū yiguīji Dios”, yi tuoĭabojacu yu maji. Ito bajiro tuoĭabojaguti, ñarocōti cūdi jeo masibiticu yu. Adocāta, “Jesure riti yu tuorūnaja, yure boca āmigū yiguīji Dios”, yi tuoia yu ĩja. ²⁰ Adi rumuriama Jesucristo, ĩti ñami yu Ūju ĩja. Ito bajiri ĩ āmorise yu yi ñatoni yure gotiami ĩ. Adocāta yu āmoro bajiro meje ya yu. Jesucristo, Dios Macu yure ti maicōri, yu ñeñaro yirise waja, waja yirocu yure goda ĩsiñi ĩ. Ito bajiri adi rumuri ĩre tuorūnugū ñari, ĩ āmoro bajiro riti yi ñasotia yu ĩja. ²¹ “Rocati masare yiari ĩ Macure cōabojañi Dios”, yi tuoĭagū meje ña yuama. “Rētoro ñasarise ña iti”, yi tuoĭagū ña yu. Bucurā ĩna rotirise mani cūdire waja Dios ĩ masoja, Cristo goda ĩsibitiboru manire.

3

Diore tuorūnure meje ña bucurā ĩna rotire gaye

¹ Tuoya Galacia gāna mua. Jesucristore jidicācōri gaje ocajua tuorūnurā ñari queno tuoĭamena ña mua ĩja. ¿Ñimu ruore oca goticati muare? Yu goroama muare gotibiticu yu. Iti rumaju mua rāca ñagū, yucutēoju Jesucristo godare gaye oca muare queno goticu yu. Iti oca tuocōri queno rūcubocu mua maji. Ito bajibojarocati ruore oca riasori masare tuorūncōri, Jesucristore jidicā āmoa mua. Ito bajiro mua yija, queno tuoĭamena ña mua. ² Coji gaye muare seniña āmoa yu: ¿Moisés ñayoru ĩ rotire gaye mua cūdija ticōri, Espiritu Santo quedi sājacati

muare? Ito bajirojua meje baja. Jesucristo oca tuocōri, ĩre mua tuorũnũja bero, muare quedi sãjañi Espĩritu Santo. ³ ¿No bajiati, mua tuoĩarise jedicoati muare? Iti rumũju Jesucristore mua tuorũnũja ticōri, mua ya usiju quedi sãjañi Espĩritu Santo. Ito bajibojarocati, “Bucurã rotire gaye mani tuorũnũja ticōri, manire masogũ yiguĩji Dios”, yi tuoĩabojaja mua adi rumuri. Itire tuoĩabesa mua. ⁴ ¿Muare rētagore ñajediroti ācabojocoati mua? Ito yicōri, ¿Mua tōbũjare gaye cuni ācabojocati mua? “Itire ācabojamenaji ĩna”, yi tuoĩa yu muare. Itire tũdi tuoĩacōri queno tuoĩarã yirãji mua mucana. ⁵ Espĩritu Santo queo sãñi Dios muare. Ito yicōri jaje tiyamani, mua tiro riojo ĩoñi Dios. Judio masa bucurã ĩna rotire gaye mua tuorũnũjare ¿ito bajiro yicati Dios? Ito bajiro meje baja. Jesucristo oca mua tuorũnũjare, ito bajiro yĩni Dios.

⁶ Abraham ñayorũre tuoĩate mua. ĩama Dios busirisere tuorũnũyiju. Ito bajiro ĩ yija ticōri, “Queno yigu ñami Abraham”, yiyiju Dios. ⁷ Iti ocare tuocōri, ado bajiro yi tuoĩa mani: “Mani Abraham ñayoru bajiro Diore tuorũnũrã ñari, ĩ janerãbatia robo bajirã ña mani ĩja”, yi tuoĩa mani. ⁸ Jane mejeju iti gaye gotisuoijũ Dios ĩ oca tutina. Ito yicōri judio masa meje ñarã Diore ĩna rũcũboroti gaye gotisuoijũ Dios. “Judio masa mejere cuni masogũ yiguja yu”, yirocu ado bajiro yiyiju Dios Abrahamre: “No gãji mu robo bajiro yure ĩ tuorũnũja ticōri, ñeñaro ĩ yirisere ācabojogu yiguja yu”, yiyiju Dios Abraham ñayorũre. ⁹ Diore queno tuorũnũyiju Abraham. Ito bajiri ĩre queno yiyiju Dios. Adi rumuri cuni, no Jesucristore tuorũnũgũre queno yigu yiguĩji Dios.

¹⁰ “Moisės ñayoru ĩ rotirisere yu cudi jeoja ticōri, yure masogũ yiguĩji Dios”, yi tuoĩabojagure, seti ña ĩre maji. Ito bajiri ĩre masobiquĩji Dios. Ito yicōri ĩre waja senigũ yiguĩji Dios. Ado bajiro yi ucañi Moisės ñayoru: “No adi

papera tuti rotirisere cudi jeobicure, seti ña ñre maji. Ito bajiri ñre waja senigũ yiguĩji Dios”, yi ucañi Moisés ñayoru. ¹¹ Iti oca tuocõri, “Judio masa bucurã rotire gaye cudi jeo masibea mani. Ito bajiri, ‘Queno cudi jeorã ña mua’, yibiquĩji Dios manire. Sĩgũ ñarocõti cudi jeogu maquĩji”, yi tuoña masia mani. Ado bajiro yi gotia Dios oca tuti: “No Diore tuorũnugũre, ‘Queno yigu ña mu’, yigu yiguĩji Dios ñre. Ito yicõri i catitĩñaroca yigu yiguĩji Dios”, yi gotia Dios oca tuti. ¹² Ito bajibojarocati, “Bucurã rotire gaye yu cudi jeoja, yure seti manoja”, yirã, Diore tuorũnurã meje ñama ñaõna. Diore tuorũnure meje ña bucurã rotire gaye mani tuorũnũja. Ado bajiro yi ucañi Moisés ñayoru: “No adi tuti rotirise cudi jeoguti, seti manicõri Dios rãca queno ñagũ yiguĩji ñ”, yi ucañi Moisés ñayoru.

¹³ Ito bajibojarocati ñarocõti bucurã rotire gaye cudi jeo masibea mani. Ito bajiri seti jaje ña manire. Ito yicõri jairo ñeñaro yirise waja, waja ruyurioa mani. Itire masicõri, mani ñeñaro yirise waja, waja yi ñsirocu goda ñsiñi Cristo. Ado bajiro yi gotia Dios oca: “Yucugujũ sũgũre ña sã yoja, seti cutigu ñaguĩji ñocũ”, yi gotia Dios oca tuti. Mani ñeñaro yirise waja, manire waja yi ñsirocu yucutẽojũ goda ñsiñi Cristo. ¹⁴ Jane mejeju ado bajiro goticãiyijũ Dios Abraham ñayoru: “No mũre bajiro yure tuorũnurãre, queno yigu yiguja yu”, yiyijũ Dios Abraham ñayoru. Judio masa mani ñaja, judio masa meje mani ñaja cuni, Jesucristore mani tuorũnũja manire masogũ yiguĩji Dios. Ito yicõri ñ goticato bajiroti Espĩritu Santo queo sãgũ yiguĩji Dios manire.

Ado bajiro yicuja yu, Dios ñ yire gaye

¹⁵ Queno tuoya yu ñarã mua. Goti masiore ocana mũare gotigu ya yu. “Ñ yiro robo yibisĩ ñ”, gãjerã yibe yirona, “Ado bajiro yicuja yu”, yi ucasotia mani. Ito bajiro mani yi ucajare, “Meje ñ yiro bajiro yibisĩ ñ”, yi masimenaji

gãjerã. Mani ucacãre ñajare, busi remo masimenaji ñna ñja. ¹⁶Jane mejeju cuni, “Ado bajiro yicuja yu”, Abrahamre Dios ñ yija, ucare ñna iti cuni. Ado bajiro Abraham ñayorure goticãñi Dios: “Sĩgũ mu janamina suoriti masa jeyarore queno yigu yiguja yu”, yĩni Dios Abraham ñayorure. “Mu janerãbatiana suoriti masa jeyarore queno yigu yiguja yu”, yibisĩ Dios. “Sĩgũ mu janamina suoriti”, ñ yija, “Jesu-cristona suoriti”, yireoni ñna iti. ¹⁷Mua queno tuo masitoni mware goti rëtobugũ ya yu. Ado bajiro goticãñi Dios Abrahamre. “No mu robo yure tuorũnũgũre, ñre masogũ yiguja yu”, yi goticãñi Dios ñre. Ito yija cuatrocientos treinta rodori bero ñ rotirise Moisésna cüyiju Dios, judio masa ñna cãdijaro yirocu. Ito bajiro yigu, “Jane mejeju Abrahamre yu gotiyocatire jidicãcõri gaje wasoagu ya yu”, yirocu meje yiyiju Dios itire. Ito bajiri, “Abrahamre ñ gotiyorere jidicãcõñi Dios”, yi tuoñabea mani. ¹⁸ Moisés rotirise mani cudi jeore waja meje manire masogũ yiguñi Dios. Ñarocõti Moisés rotirise cudi jeo masibea mani. Ñ rotirise mani cãdire wajana suoriti manire Dios ñ masoja, Abraham ñayorure Dios ñ goticãre rocati bajiro ñaboroja iti. “Yure mu tuorũnũja, mure queno yicuja yu”, yicãñi Dios Abrahamre. Ito bajiri Abraham ñayoru robo bajiro Diore mani tuorũnũja manire masogũ yiguñi ñ.

¹⁹ Ito bajicõri, ¿no yija ñ rotirisere cüyijari Dios manire? Ado robojua baja. “Dios rotirisere cudi jeo masibea yu. Ñeñaro yi jaigu ñna yu”, mani yitoni ñ rotirisere cũñi Dios manire. Ito bajiri, “Sĩgũ mu janamina suoriti masare masogũ yiguja yu”, Abrahamre yiru ñ ejaroto riojua ñ rotire ñacãyiju manire. Dios ñmasiti, Moisésre gotibisiju ñ rotirise. Ñ ñaro gãna ángel mesare Moisésre goti rotiyiju Dios. Ñna gotija tuocõri, judio masajuare gotiyiju Moisés mũcana. ²⁰ “Sĩgũ mu janamina suoriti masare masogũ yiguja yu”, Dios ñ yija, ñmasiti Abrahamre gotiyiju. Iti

gayereama ángel mesare goti rotibisijũ Dios. Īmasiti Abraham ñayorũre gotiyijũ Dios.

“Ñeñaro yigũ ña yũ”, mani yi tuoĩatoni, ĩ rotirise manire cũñi Dios, yire gaye

²¹ ¿Moisésre ĩ rotire gaye ĩ cũroca Abrahamre ĩ goticãrere jidicãyijari Dios? Meje ĩ goticãrere jidicãbisijũ Dios. Ado robojũa bajaia. Catitĩñare gaye mani bũjatoni meje ĩ rotirise cũyijũ Dios. Ī rotirisere cudi jeo masibea mani. Ito bajiri, “Cudi jeorã ña mũa. Queno yirã ña mũa”, yibiquĩji Dios manire. Ī rotirise mani cudi jeoja ticõri, “Queno yirã ña mũa”, yiboguĩji gajea. ²² Ito bajibojarocati cudi jeo masibea mani. Dios oca tuti gotiado bajiroti bajaia iti. “Masa jeyaro ñeñaro yama ĩna. Sĩgũ ruyabeto seti cutirã ñama ĩna”, yi gotia Dios oca. Ī rotirise cudi jeo masibea mani. Ito bajibojarocati jane mejeju Abrahamre Dios ĩ goticãrena suoriti manire maso masiguĩji Dios. Jesucristore mani tuorũnũja ticõri, manire masogũ yiguĩji Dios, ĩ goticãdo bajiroti.

²³ Iti rũmũ, “Jesucristore yũ tuorũnũja ticõri, yũre masogũ yiguĩji Dios”, yi masibiticũ mani maji. Itire mani masiroto riojũa, “Dios ĩ rotirise riti ña mani cudiroti”, yi tuoĩacũ mani maji. Ito bajibojarocati Dios ĩ rotirise cudi ãmobojarãti, cudi jeo masibiticũ mani. ²⁴ Jesucristo ejaroto riojũa Dios ĩ rotirisere riasoticũ mani. Itire riasoticõri, “Ñeñaro yigũ ña yũ. No bajiro ñeñaro yũ yirise jidicã masibea yũ”, yi tuoĩacũ mani maji. Ito bajiro tuoĩacũ mani maji Jesucristo ĩ ejaroto riojũa. Adi rũmũriama, “Jesucristore yũ tuorũnũja, yũre masogũ yiguĩji Dios. Ito bajiri ĩ rãca queno wanũ catitĩñagũ yiguĩja yũ”, yi tuoĩa mani ĩja. ²⁵ Adi rũmũriama Jesucristore riti tuorũnũjũa manire. Ito bajiri, “Judio masa bũcurã

rotire gaye yu cudi jeoja, yure masogũ yiguĩji Dios”, yi tuoĩabitirũja manire ĩja.

²⁶ Tũoya mua. Jesucristore tuorũnũrã ñacõri adocãta Dios rĩa ña mua cuni ĩja. ²⁷ Jesucristore tuorũnũcõri, idé gu rotiyija mua cuni. Ito bajiro mua yija ticõri, Jesucristo queno ĩ yi ñado bajiro mua queno yi ñaroca yami Dios mũare. ²⁸ Sĩgũ robo bajiro ti maiguĩji Dios manire. Sĩgũre bajiro tuoĩacõri Jesucristore tuorũnũa mani. Ito bajiro mani yija ticõri, itina suoriti manire masoñi Dios. Co masa bajiroti masoñi Dios manire. Tite mua, jeyaro ña mani. Judio masa, judio masa meje cuni ña mani. Moa ĩsiri masa, moa ĩsiri masa meje cuni ña mani. Romia, ãmua cuni ña mani. Jeyaro mani masa wusabobarocati Jesucristore mani tuorũnũja ticõri, co masa bajiroti masoñi Dios manire. ²⁹ Ito yicõri, judio masa meje ñabobarãti, Jesucristore mua tuorũnũja Dios ñarã ña mua cuni ĩja. Ito bajiri ĩ ñarã mua ñaja, yu bajiroti, Abraham ñayoru janerãbatia ña mua cuni ĩja. Ito bajiri, “Mu janerãbatiare queno yigu yiguja yu”, Dios Abrahamre ĩ goticãdo bajiroti mũare cuni queno yigu yiguĩji Dios ĩja.

4

¹ Mũcana gaje mũare goti remoa yu. Coriarã ado bajiro yama ĩna macu ñasũogure: “Macu, mu jai tujaroca jeyaro yu rucorise mu yeti ñaro yiroja”, yama coriarã, ĩna macu ñasũogure. Macuacã ñagũ, jai tujabicu ĩ jacu ye gajeonire rucõ masibiquĩji maji. Ito bajiri ija rucorocu ñabojaguti, ĩ rucoroto riojua ĩ jacure moa ĩsiri masu bajiro bajiami ĩ maji. ² Macuacã ĩ ñaroca ĩ jacure moa ĩsiri masa ĩre coderã yirãji. Ito yicõri ija ĩ rucorotire cuni coderã yirãji ĩna. “Yu macu ĩ jai tujaroca jeyaro yu rucorise ĩre ĩsima”, jacu ĩ yiri rumu ejaroca ĩre ĩsirã yirãji ĩna. Ito bajiri moa ĩsiri masu bajiro meje bajigu yiguĩji ĩ ĩja. ³ Mani cuni Jesucristore mani tuorũnũroto riojuaju ito bajiroti bajibojacu maji.

“Bucurã rotire yu cudi jeobeja quenabeto tóbujagu yiguja yu”, yi tuoïabojacu mani. Ito bajiri Cristore masibiticõri rûmûare moa ïsirã bajiro bajirã ñacu mani maji. ⁴ Ito bajiro mani bajibojarocati, “Masare yiarì yu Macure cõagũ yiguja yu”, Dios ï yiri rumu ejayija ïja. Ito bajiri Dios Macu ñabojaguti, romiona rujeañi Jesucristo. Ito yicõri judio masu rujeañi ï. ⁵ “Bucurã masa ïna rotire gaye yu cudibeja, quenabeto tóbujagu yiguja yu”, yi gua masa tuoïabojarocati, manire yiarì ï Macure cõañi Dios. ï rãa mani ñatoni manire masorocu ï Macure cõañi Dios.

⁶ Ito bajiri Jesucristore mani tuorũnaja, Dios rãa ña mani ïja. ï rãa mani ñajare ï Macu Jesucristona suoriti, manire Espiritu Santo queo sãñi Dios. Ito bajiri, “Cuna, yu Jacu”, ya mani Diore. ⁷ Diore tuorũnucõri, “Bucurã rotire gaye yu cudibeja, quenabeto tóbujagu yiguja yu”, yi tuoïabea mani ïja. Dios rãa ña mani ïja. Ito bajiri, Abraham ñayorure, Dios ï gotiado bajiroti manire masocõri, manire queno yigu yiguji Dios.

Jesure masirãre Pablo ï tuoïa oca jaire gaye

⁸ Tuoya mua. Iti rumuju Diore masibisija mua maji. Diore masibiticõri, bucurã masare rucubuooyija mua. Dios meje ïna ñabojarocati bucurã ñayoanare rucubuooboyija mua. “Ïna rotirise mani cudibeja, quenabeto tóbujarã yirãji mani”, yi tuoïa güiyija mua maji. ⁹ Adi rumuriamu Diore masirã ña mua cuni ïja. Ito bajijare Dios ïmasiti muare ti masiami ïja. Diore tuorũnucõri bucurã rotire gaye jidicãcu mua. Ito bajibojarocati yu tuoja, bucurã ïna rotire gaye rucubuooyija mua mucana. “Bucurã rotire gaye mani cudibeja, quenabeto tóbujarã yirãji mani”, ;yi tuoïa güi ãmoati mua mucana? ¹⁰ Ado bajiro tuoïabojarãji mua mucana: “Judio masa ïna rotirere mani rucubuoja, manire masogu yiguji Dios”, yi tuoïabojarãji mua. Ito bajiro tuoïabojacõri, “Adi rumu rucubuora rumu ña, adocõ ñami

gagu ĩ tujaroca adocō jue iti tujaroca, ito yicōri adocō cūma iti tujaroca rūcūbūoroti ña”, yi tūoĩabojarāji mūa. ¹¹ “Mūare riasobojacu yu”, yiadoti bajia yure ĩja. Ito bajiro mūa bajija tūocōri, bojori bāja yu.

¹² Yu mairā, mūare queno gotia āmoa yu. Jesucristore tūorūncōri, gūa judio masa būcurā tūoĩare gaye jidicācu yu. Yu robo yiya mūa cūni. Jesucristore riti tūorūnuña mūa. Ito yicōri būcurā tūoĩare gaye jidicāña mūa. Iti rūtūju ito bajiro mūare yu riasoja, queno yure boca āmicu mūa maji. ¹³ Mūa masia, cajero Jesucristo oca mūare yu riasoja cō ñacu yu. ¹⁴ Cōgū, yu ñabojarocati, yure ti tebiticu mūa. “Cōgū wadiami”, yibojarāti, queno yure boca āmicu mūa. Ado bajiro yicu mūa. Dios ñaro gagu ángelre boca āmirā robo bajiro, queno yure boca āmicu mūa. Ito yicōri Jesucristore boca āmirā robo bajiro queno yure boca āmicu mūa. ¹⁵ Mūa tūju yu ñaroca queno wanū quenacu mani maji. “Queno wanūmenaji ĩna”, yi tūoĩa yu mūare. Iti rūtūju yure ti maicōri, queno yure ejabūa āmocū mūa maji. “Mūa ya cajea mūa rua masija, yure ĩsibocu mūa”, yi tūoĩa yu mūare. ¹⁶ Oca quenarise riti riojo mūare goticu yu. Iti yu gotijare ¿yure ti feati mūa ĩja?

¹⁷ Judio masa rotire gaye oca mūare riasoana, mūare queno yi āmorā meje ñarā yirāji ĩna. Mūare queno yirona meje baba cutirāji ĩna. Ito bajiro mūare rūorāji ĩna, yure mūa jidicātoni. Ito yicōri ĩnare riti mūa tūorūnure āmorāji ĩna. ¹⁸ Riti, mūare queno yi āmorā ĩna ñajama, mūare baba cutirona wanure oca rāca ĩna busija, quena ñaroja. Ito bajirojua yirūja ĩnare. Mūa tūju yu ñaja, mūa tūju meje yu ñaja cūni, ito bajiro riti yirūja ĩnare. ¹⁹ Yu mairā, yu rīa robo bajirā ña mūa. Mūare buto tūoĩa ña yu. Romia ĩna rūcoroto riojua buto tūoĩa būjatomenaji ĩna. Ito bajiroti mūare tūoĩacōri, būjato bajia yu

cuni. Gaje mua tuoĩasuoꝛe jidicãcõri, Jesucristore riti mua tuorũnuroto riojua, muare tuoĩa ñagũ yigũja yu. ²⁰ Mua tũju oca quenorocu mua rãca ña ãmoboja yu. Muare buto tuoĩa usirioa yu. Ito bajibojarocati sõju ñacõri ñe gaje muare goti ejabua masibea yu ñja.

Sara, Agar ñna bajire gaye

²¹ Tuoya yu ñarã mua. “Moisés ñayoru ñ rotire mani cudija, manire masogũ yiguĩji Dios”, yi tuoĩbojarãji mua. Ñ rotiyorere queno tuo masibea mua. ²² Ado bajiro yi ucare ña: “Ûmua jũarã rĩa cutiyiju Abraham ñayoru. Ñ manojore moa ñsiri maso, Agar wame cutigo, sīgũ macu cutiyijo iso. Ñ manajo ñasago cuni sīgũ macu cutiyijo iso”, yi ucare ña iti gaye. ²³ Romia gãjerã ñna macu rucoro bajiroti macu cutiyijo Agar cuni. Sara bucojuama, Dios ñ gotiada bajiroti, rĩa mani waro ñabojagoti, sīgũ macu cutiyijo iso cuni ñja. ²⁴⁻²⁵ Iti oca muare goticõri, iti oca gayere queno muare goti masio ãmoa yu. Ado bajiro bajia iti oca. Ñna romia jũarãre rẽtare gaye tuoĩacõri, juaji Dios ñ goticãre gaye cuni tuoĩarã yirãji mani. Arabia sitaju, Sinaí wame cutiricu gũtagũ joeju Moisés ñ rotirotere ñsiyiju Dios. Iti gũtagũ judo gago ñayijo Agar ñayoro. Gãjerãre moa ñsiri maso ñayijo iso. Iso janerãbatia cuni gãjerãre moa ñsiri masa riti ñayijarã ñna. Noa, “Moisés ñ rotirere mani cudi jeoja, manire masogũ yiguĩji Dios”, yi tuoĩarã ñna ñnama Agar janerãbatia ñayoana robo bajiro tuoĩarã. Rũmũare moa ñsiri masa bajiro bajiamã ñna. Ito bajiro bajibojama yu ñarã judio masa. Moisés rotirisere cudi ãmobojarãti, cudi jeo masibeama ñna. Ito bajiri Diore tuorũnumena ñari, Agar janerãbatia ñayoana robo bajirã ñnama, yu ñarã Jerusalén gãna. ²⁶ Maniamã Sara janerãbatia ñayoana robo bajirã ña mani. Gãjerãre moa ñsiri maso meje ñayoyijo Sara. Jesucristore tuorũnucõri, rũmũare moa ñsirã meje ñarãji mani ñja. “Judio masa bucarã rotire gaye yu cudi jeobeja,

yure masobiquíji Dios”, yi tñoia güirã meje ña mani íja. “Jesucristore yu tuorũnũja, yure masogũ yiguíji Dios”, yi tñoia wanurã ña maniamã íja. ²⁷ Sarare tñoia yugu ado bajiro ucañi Diore goti ísiri masu:

Rĩa mani waro tñoia mu. Rĩa maco ñabojagoti, queno wanu quenaña mu. Junirise tñoiabiticõri, wanu quenaña mu. Jãjarã mu janerãbatia cutiroca yigu yigũja yu. Mure moa ísiri maso rëtarõ janerãbatia cutigo yigoja mu, yiyiju Dios í oca tutina.

²⁸ Yu ñarã, Dios í gotiado bajiroti macu cutiyijo Sara, Abraham manõjo. Isaac wame cutigu ñayiju iso macu. Mani cuni Jesucristore tuorũnũcõri, Dios rĩa ña mani íja. Abrahamre Dios í gotiado bajiroti í rĩa ña mani cuni íja. ²⁹ “Espíritu Santona suoriti macu cutigo yigõji Sara”, Dios í gotiado bajiroti Isaac wame cutigu macu cutiyijo iso. Isore moa ísiri maso macu buto ti tudiyiju Isaacre. Adi rumuri ito bajiroti bajia manire cuni. Jesucristore mani tuorũnũja ticõri, manire ti tudirã yirãji Moisés rotiyore rucuborã. ³⁰ Abrahamre Dios í busiyore gotia Dios oca tuti. Abrahamre ado bajiro yiyiju Dios: “Mu manõjore moa ísiri masona mu macu cutiru mu ya gajeonire rucobicu yiguíji í. Mu manõjona mu macu cutirujua í ñagũ yiguíji mu ya gajeoni rucorocũ. Ito bajiri mu manõjore moa ísiri maso, iso macure cuni bucõaña mu”, yi gotiyiju Dios Abrahamre. ³¹ Yu ñarã, moa ísiri maso janerãbatia meje ña mani. “Judio masa bucũrã rotire gaye yu cudi jeobeja, yure masobiquíji Dios”, yi tñoia güirã meje ña mani íja. “Jesucristore yu tuorũnũja, yure masogũ yiguíji Dios”, yi tñoia masirã ña mani íja. Ito bajiri Sara ñayoro janerãbatia robo bajirã ña mani cuni.

5

Ñenarise mano quenarisena riti ñaña mua, yire gaye

¹ Iti rumuju rúmáre moa ísiri masare bajiro mani bajibojarocati, manire masoñi Cristo. Íre mani tuorúnja ticōri, manire masoñi í. Ito bajiri buto busa íre tuorúnruja manire. Ito yicōri, “Bucurã ina rotire gaye yu cudi jeobeja, yure masobiquíji Dios”, yi tuoia güibitiruja manire. Ito bajiro mani tuoíabojaja, mucana rúmáre moa ísiri masa bajiro bajirã ñarã yirãji mani.

² Tuoya mua. Mware ado bajiro gotisagu ya yu: “Bucurã rotiro bajiro, wiro yu ta rotija, yure masogũ yiguíji Dios”, ¿yi tuoíati mua? Ito bajiro mua tuoíabojaja mware maso masibiquíji Cristo. ³ Mucana mware goti quenogũ ya yu. No, “Bucurã rotiro bajiro wiro yu ta rotija, yure masogũ yiguíji Dios”, yi tuoíagũ, ñarocōti rotirise gaye cudi jeorujami íocu. Ito bajibojarocati ñimujua cudi jeogu maquíji. ⁴ “Yu ñeñaro yirise waja, waja yirocu judio masa bucurã rotire gaye cudicuja yu”, yi tuoíabojarãji coriarã. Ito bajiro tuoíarã, Jesucristore jidicãcōri íre tuorúnruã meje ñama inaõna. Ito yicōri Dios inare masorocu, í queno yi amobojarisere boca amimenaji ina. ⁵ Espíritu Santo í ejabuarisena Jesucristore tuorúnua maniamá. Ito bajiro Jesucristore mani tuorúnja ticōri, “Queno yirã ña mua”, yigu yiguíji Dios manire. Ito bajiro í yija, “Manire masogũ yiguíji Dios”, yi tuoia mani íja. ⁶ Wiro mani taja, mani tabeja cuni ñasarise meje ña iti. Itina suori meje manire masogũ yiguíji Dios. Cristore mani tuorúnja, ito yicōri gãjerãre mani ti maija, iti ña ñasarise. Ito bajiro mani yija ticōri, manire masogũ yiguíji Dios.

⁷ Jesucristore tuorúnusocōri, í amoro bajiroti queno cudi yija mua maji. Adi rumariama íja, í oca ñasarisere queno cudibeá mua. ¿Ñimã Jesucristo ocare mua jidicãroca yicati mware? ⁸ “Dios meje í ocare ina jidicãroca yíni”, ya yu mware. Dioti ñami manire besecōri Jesucristo ocare mani tuorúnuroca yiru. ⁹ Naju wadarise uco gayere

tuoĩate mua. Naju cujare jabeto uco mani wuoja, queno wusa quenaroja. Ito bajiroti bajia ruore oca cuni. Ruore ocare tuorũnucõri, jãjarã itire tuorũnurã yirãji. Ito bajiri ruore ocare tuorũnucõri jãjarã busa cudi warã yirãji masa. ¹⁰ “Gãjerã muare ruore oca ña gotija, ñare mua tuorũnũme yirocu, muare ejabuagu yiguĩji Cristo. Ito bajiri ñ oca muare yu riasorisere jidicãmenaji ña”, yi tuoĩa yu muare. “No muare ruore oca gotirãre waja senigũ yiguĩji Dios ñare”, yi tuoĩa yu.

¹¹ Ado bajiro ruorãji ña muare: “Dios rãca queno mani ña ãmoja, judio masa ña rotiado bajiro wirotaruja mani”, yami Pablo manire, yi goti ruorãji ña muare. Ito bajiro masare riasobea yu. Ito bajiro yu riasoja, yure ti tudibitiboana judio masa. Yuama ado bajirojua riasoa: “Mani ñeñaro yirise waja, waja yigu yucutẽoju godaĩni Cristo. Ñre mani tuorũnũja ticõri, manire masogũ yiguĩji Dios”, yi riasoa yuama. Ito bajiro yu riasoja ticõri, yure ti tudiana judio masa. ¹² Muare ruore oca gotirã, buoro usirioro muare wirotarãji ña. Yu tuoĩaja, ñamasiti rutaja quenaboyija yureama. Ito yicõri, “Gajeroju ña waja, quena ñaboroja”, yi tuoĩa yu.

¹³ Yu ñarã, muare beseñi Dios, ñ ñarã mua ñatoni. Judio masa bucurã rotire gaye muare cudi rotibisiju Dios. Ñ rotibitibojarocati, “Yu ya ruju iti tuoĩaro bajiro yicuja yu”, yi tuoĩabitiruja muare. Ado bajirojua mua yi ñaja quena. Gãjerãre ti maicõri ñare ejabuaya mua. ¹⁴ Jaje rotire gaye ñaborarocati coji gayeti ña buto busa ñasarise. Ado bajiro bajia iti. “Mu ya rujure mu ti mairo bajiroti mu ñarãre cuni ti maiña”, yi gotia iti. Disejua gaje Dios ñ rotirise rẽtocũrise manojã. ¹⁵ Mua ñarãre mua ti tudija, ito yicõri ñare mua oca menija, queno ña rãca ña masimenaji mua. Ito bajiri ruore oca riasorãre tuorũnũbesa. Mua ñarã rãca queno mua ña masitoni queno tuoĩaña.

Espíritu Santo ã amoru bajiro mani cudija quena, yire gaye

¹⁶ Ado bajiro gotia yu muare. Manire Espiritu Santo ã rotiro bajiroti mani cudija quena. Ito bajiro mani yija, manimasiti mani ya rujũ ñeñaro iti tuoñaro bajiro yimenaji mani. ¹⁷ Mani ya rujũna ñeñaro mani yi amorise ito yicõri Espiritu Santo ã tuoñarise rãca corocõ meje ñaroja iti. Mani ya rujũna buto ñeñaro yi ãmoa mani. Ito bajibojarocati mani queno yire ãmoguñi Espiritu Santo. Espiritu Santo ã amoru bajiro mani yija, mani ya rujũ ñeñaro yire gaye yimenaji mani ãja. Ito bajiri mani queno yijaro yirocũ, manire ejabũagu yiguñi ã. ¹⁸ Espiritu Santo ã amoru bajiro mani yi ñaja, “Judio masa bucurã rotire gaye mani cudija manire masogu yiguñi Dios”, yi tuoñamenaji mani.

¹⁹ “Ito bajiro ñeñaro yama ãna ñeñaro tuoñaro bajiro yirã”, yi ti masirã yirãji mani. Ado bajiro yirãji ãna. Tite. Manojõ cutirã ñabojarãti, gãji manojore ajerãji ãna. Romia cuni ito bajiroti yirãji. Manujũ cutirã ñabojarãti, gajeo manujure ajarãji ãna. Jaje ñeñarise tuoñarãji ãna. Ito bajiri jeyaro ñeñaro ãna yi amorise yisotirãji ãna. ²⁰ Ito bajicõri ãna meni rujeoanareama rucubũorãji ãna. Gãjerãre rojarãji ãna. Gãjerãre terãji ãna. Gãmeri tudirãji ãna. Ito yicõri gãjerãre ti tudirãji ãna. Junisinirãji ãna. ãna amoru bajiro riti yirãji ãna. Sigũre bajiro tuoña ãmomenaji ãna. Rocati oca rujeocõri, gãjerã ãna ña masibeto yirãji ãna. ²¹ Gãjerã ya gajeonire ti uorãji ãna. Gãjerãre sãarãji ãna. Idire idicõri mecurãji ãna. Mecucõri rocati yirãji ãna. Ito yicõri jeyaro ñeñarise yirãji ãna. Iti rumujũ muare yu goticato bajiro muare gotisagu ya yu. No ito bajiro ñeñaro yi uagu, umacũju Dios ã rotiroju ejabicũ yiguñi ã.

²² Espiritu Santo ã amoru bajiro mani yija, ñeñarise yi uyamenaji mani. Ado bajirojuã yirãji mani. Gãjerãre ti mairãji mani. Diore tuoñacõri queno wanũ quenarãji

mani. Ito yicōri mani ya ũsi queno ñaroja manire. Gãjerã manire ñeñaro ñna yibojarocati ñnare tudimenaji mani. Ñnare queno yirãji mani. Ito yicōri Dios ï ãmoro bajiroti yirãji mani. “Ado bajiro yicũja yũ”, mani yicãre ñajare ito bajiroti yirãji mani ïja. ²³ “Gãjerã rëtoro queno yigũ ñna yũ”, yi tuoïamenaji mani. Ito yicōri mani ya ruju ñeñaro yi ãmorisere yimenaji mani. Ito bajiro yirãji mani, Espiritu Santo ï ãmoro bajiro mani tuoïaja. Ito bajiro mani yija ticōri, “Rotirisere cudirã meje ñna mũa”, yimenaji gãjerã manire. ²⁴ Jesucristo ñarã ñnari ado bajiro yi tuoïarãji mani. “Yũ ñeñaro yirise waja, waja yigũ godañi Cristo. Ito bajiri yũ ya ruju ñeñaro yi ãmorisere jidicãcũja yũ. Ito bajiri ï ejabuajare, mũcana ñeñarisere yi ũyabicũja yũ”, yi tuoïarãji mani. ²⁵ Catitĩñare mani bujatoni, Jesucristore mani tuorũnuroca yiñi Espiritu Santo. Ito bajiri ï ãmoro bajiro yirũja manire.

²⁶ “Gãjerã rëtoro masigũ ñna yũ”, yibitirũja manire. Ito bajiro mani yibeja, manire ti tudimenaji gãjerã. Ito yicōri mani rãca junisinimenaji ñna.

6

Gãmeri ejabuaja quena, yire gaye

¹ Yũ ñarã, Espiritu Santo ï quedi sãjana ñna mũa. Ito bajiri sigũ mũa rãca gagũ ï ñeñaro yija, ïre ejabuaya, ï ñeñaro yirise ï jidicãtoni. ïre ti maicōri, ïre ejabuaruja mũare. Ito yicōri queno tuoïaña mũa, ïre bajiro mũa ñeñaro yibe yirona. ² Mũa rãca gãnare oca iti ñaja, ñnare ejabuaya mũa. Ito bajiro mũa yija, Jesucristo ï rotiro bajiroti cudirã yirãji mũa.

³ Sigũ “Ñeñaro yigũ meje ñna yũama. Ñnari masũ ñna yũ”, ï yi tuoïaja, ïmasiti rũoami ïocũ. ⁴ Ado bajiro mani tuoïaja quena: “¿Yũ yirise quena ñarajada? Quenabeto-jada gajea”, yi tuoïaruja manire. Ito bajiro tuoïacōri, “Yũ

yirise quena ñaroja, Dios ï tija”, mani yi masija, wanurã yirãji mani. “Yũ sîgũti ña queno yigũ. Ìnama queno yirã meje ñama”, yi tuoïabitiruja manire. ⁵ Masa jeyarore ña ñeñaro yirise waja, waja senigũ yiguïji Dios. Ito bajiri ñeñaro mani yija iti waja manimasiti quenabeto tøbujarã yirãji mani.

⁶ No Jesucristo oca mũare riasogure ïre ejabuaruja mũare. Ito yicõri mũa rucorise ïre cuni jabeto ïsiña.

⁷ Queno tuoïaña mũa. Jeyaro mani yirise masiguïji Dios. “Ñeñaro yũ yija, masibiquïji Dios”, mani yi tuoïabojaro-cati, masi jeocõguïji Dios. Ñe ï masibiti manoja. Queno tuoja. Goti masiore ocana mũare gotigũ ya yũ. Bia aje mani oteja, bia judiro yiroja. Mani otero bajiroti judiro yiroja. ⁸ Ito bajiroti bajia mani yirise cuni. Mani ya ruju ñeñaro yi ãmorise mani yija, itire waja yirãonati jeame ãjuroju warã yirãji mani. Gajereama, Espiritu Santo ï ãmoro bajiro mani yija, mani wanuroca yigũ yiguïji ï. Ito yicõri Dios rãca catitĩnarã yirãji mani ïja. ⁹ Ito bajiri quenarise yi jidicãmenati itire yitĩnaruja manire. Quenarise mani yi jidicãbeja, Dios ï ãmori rumũ ï goticato bajiroti manire queno yigũ yiguïji ï. ¹⁰ Ito bajiri mani queno yi masirocõ, masa jeyarore queno ejabuaruja manire. Ito yicõri manire bajiro Jesucristore tuorũnurãre cuni bũto bũsa mani ejabũaja quena.

Pablo ï goti quenosusare gaye

¹¹ Adi yũ gotisusarise, yũmasiti uca yũ. Tiya, wame curisena uca yũ. ¹² Wiro mũare ta rotirã, gãjerã judio masa rãca queno ñarona, mũare rotirãji ña. “Jesucristona suoriti masare masogũ yiguïji Dios, yi gũa riasoja, gũare ti tudirã yirãji gãjerã judio masa. Ito bajiri gũa tøbujaroca yirãji ña”, yi tuoïa güirã ñama, mũare wiro ta rotirã. Itire güirã ito bajiro mũare wiro ta rotirãji ña. ¹³ Wiro tagoana ñabojarãti, judio masa bũcurã ña rotire gaye queno cudi

jeomenaji ñna. Cudi jeomena ñabojarãti muare wiroti ta rotirãji ñna. “Galacia gãnare wiroti gũa ta rotija tuoõõri, guare wanũrã yirãji masa”, yi tuoõõri, ito bajiro muare rotibojarãji ñna. ¹⁴ Ñna robo riasobeã yũama. Yucutõõju Jesucristo ñ godare oca yũ riasoja, iti gayere riti wanũa yũ. Yũre ñ ejabuarisena suoriti adi macãrucũro gaye gajeonire buto tuoõabeã yũ ñja. Ito yicõri, ñre masicõri adi macãrucũro gaye ñeñarise yi ñmobeã yũ. ¹⁵ Mani wiroti taja, mani tabeja cuni ñasarise meje ña iti. Itina suoriti meje manire masogũ yiguõji Dios. Jesucristore tuorũnũõri mani ñeñarõ yirise mani jidicãja, mame tuoõare gaye ñaroja manire. Iti ña ñasarise. ¹⁶ Ñeñarõ mani yirise jidicãõri, Jesucristore mani tuorũnũja, Dios ñarã ñarãji mani ñja. No ito bajiro tuoõagũre yiarĩ Diore busi ñsia yũ. Ñna ya usijũ queno wanũ quenajaro, yirocũ muare yiarĩ Diore senisotia yũ. Ito yicõri muare ñ ti maitoni, muare yiarĩ ñre busia yũ.

¹⁷ Jesucristo oca yũ goti ucujare yũre ñeñarõ yicã masa. Ito bajiro yũre ñna yigore jaje camigodo ña yũre. Ito bajiri itire ticõri, “Jesucristo oca goti ucuri masũ meje ñami Pablo”, yibeja mũa ñja.

¹⁸ Yũ ñarã bajiroti muare maia yũ. Mũa ya usijũ ñacõri muare queno yijaro mani Uju Jesucristo, yisũsa yũ. Itocõ ña.

Dios Oca Tuti New Testament in Macuna

copyright © 2012 Wycliffe Bible Translators, Inc.

Language: Macuna

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Macuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06
